

10

in die handt gab oder ir verhiefs, wie das liedt sprücht;
er bracht sie mit ainem solichen heftigen segen ufs lotter-
bet. Das alles konte der landtfarer hören. Der war ab
disem gefert erwacht und hielt sich ganz still, warzunemen,
5 was doch daraufs werden welt. Indess, wie der paurenknecht
ganz liederlich anfangs mit der sach umbgieng, zu gedenken,
er seie domals noch in leerjaren gewesen, und darnach sich
ie greusenlicher stellen wardt, begert die guet dochter, er
solte gemacht thuen und bei gueter zeit ufhören, damit kain
10 jung daraufs würde. Das be[1008]williget der paurenknecht
und erpot sich, er wellt hüpschlich und seuberlich einher
faren, auch ohne schaden machen. Fürwar, der gueten
dürnen war ernst. Die bedrachtet anfangs allen nachteil,
der daraufs megte erfolgen, aber wie der grob paurenknecht
15 mit seinem wüesten schnidmesser den kitzel in das hünder
vierthail bracht, fieng sie mit niderer stim an zu jemern und
zu schreien: »Ach, mein lieber Hanns, stich umb dich und
stich in alle wendt und wie du wilt, du darfst kain kindt nit
fürchten! Lieber Jockel, far für! höre nit baldt uf und fick
20 mich, lieber Petter!« Der guet landtfarer, der hünder dem
offen sas, mochte alle dise wort hören; der hette inen dise
gugelfur wol gunnen megen, dann er für sein person in
sollichem fahl nit efsig, sonder het ain faiste suppen dafür
genommen. Aber es war dem gueten man umb sein fidel
25 zu thuen, die an der wandt hienge. Derhalben, wie er ver-
nimpt, das der paurenknecht in alle wendt umb sich stechen
solt, fürcht er seiner geigen, das im der ungehewr knebel
die in sollichem gedresch auch durchstechen oder zergengen
mecht. Derhalben schreit er überlaut: »Gueter fründt, stich,
30 wie du wellest, so verschon mir diser wandt! daran hab ich
mein geigen hangen;

Darmit thue ich mich ereren
Und des hungers erwerben.
Mein handtwerk ist für faule gesellen,
35 Die weder hewen, schneiden, noch sonst halt arbaiten wellen.«

So baldt dise wort vom velkle uf dem lotterbet vernommen,
do war kain feiren oder umbsichsehen mehr. Es machten
sich huren und buben darvon; lenger wolten sie nit bleiben,

40 Sonder liefen zu dem stall;
Da verbrachten sie die überig nacht mit schall.

*

19 fürchten] hs. fruchten.